

# Intipati dan falsafah DEB kekal

UM 23 AUG 1990

**KUALA LUMPUR, 22 Ogos** — Dato' Sri Dr. Mahathir Mohamad malam ini membayangkan bahawa intipati dan falsafah dasar ekonomi negara selepas 1990 sama dengan Dasar Ekonomi Baru (DEB).

"Kita telah bersama dengan DEB selama 20 tahun. Sekiranya prestasi Malaysia dijadikan ukuran, DEB tidaklah terlalu buruk," kata Perdana Menteri pada jamuan malam Kelab Harvard Malaysia di sini.

Perdana Menteri berkata segelintir rakyat tidak berpuas hati dengan dasar itu kerana mereka tidak dapat apa yang mereka hajati tetapi jika mereka berfikir dengan mendalam mereka mesti mengakui bahawa sekalipun tanpa DEB bukan semua orang akan memperoleh apa yang mereka mahu.

Kaum bumiputera juga tidak dapat semua yang mereka kehendaki dalam tempoh DEB itu, katanya.

Sambil berkata pada masa ini beliau sendiri belum mendapat gambaran jelas mengenai dasar ekonomi selepas 1990 itu, Dato' Sri Dr. Mahathir berkata jika pelabur tempatan dan luar negeri boleh hidup bersama DEB selama 20 tahun, sudah tentu mereka boleh hidup dengan mana-mana dasar yang diadakan oleh Barisan Nasional bagi tempoh selepas 1990.

Perdana Menteri berkata dasar ekonomi selepas 1990 merupakan satu pelan yang dihalusi untuk mencapai pertumbuhan ekonomi dengan pembahagian sama rata.

"1991 tidak akan membawa malapetaka. Kerajaan tidak mahu perubahan radikal berlaku yang hanya akan memusnahkan segala usaha yang telah dirancangan dan dicapai.

"Kita tidak mahu bersikap tidak bertanggungjawab dan terlibat dalam kerja-kerja yang mengikut hawa nafsu. Itulah jaminan saya," katanya.

Beliau menegaskan bahawa "kita telah melaksanakan DEB tanpa memusnahkan ekonomi Malaysia. Kita terpaksa bersusah-payah pada mulanya tetapi kesannya amatlah sedikit. Dengan masa berlalu kita menjadi semakin matang.

"Kita mengubahsuai pendekatan kita dan

LIHAT MUKA 2

## FALSAFAH DEB KEKAL

UM 23 AUG 1990

meminda atau menghentikan mana-mana operasi yang kurang elok. Apabila kita menghadapi kemelesetan, kite mengadakan dasar-dasar yang boleh membantu memulihkan ekonomi tanpa mengecipikan DEB."

Dato' Sri Dr. Mahathir memberi jaminan bahawa kerajaan tidak akan membinasakan ekonomi disebabkan komitmen mana-mana ideologi dan Malaysia mempunyai pengalaman dan idea mengenai cara mana untuk mengurangkan perbezaan perkauman dan menghapuskan kemiskinan tanpa menjejaskan pertumbuhan ekonomi.

Beliau menegaskan Malaysia memerlukan pelaburan asing dan kepakaran teknologi untuk jangka masa yang panjang dan kerajaan tidak akan berbuat sesuatu untuk menakut-nakutkan pelabur asing.

"Beliau berkata pelaburnn mereka akan selamat di Malaysia selagi Barisan Nasional terus berkuasa. "Kami telah membuktikan bahawa kami adalah liberal dan menerima sebarang idea."

Perdana Menteri berkata pelabur-pelabur tempatan juga tidak perlu berasa gentar terhadap dasar baru itu.

Pelaburan tempatan "agak tinggi" semasa tempoh DEB dan kerajaan bersedia mendengar dan membuat perubahan, kata beliau, sambil merujuk kepada Akta Penyelarasan Perindustrian (ICA) yang telah diubahsuai bagi memenuhi kehendak ahli perniagaan tempatan.

"Jika kita perhatikan jumlah syarikat-syarikat tempatan dan prestasi mereka, saya tidak percaya sesiapa pun boleh mendakwa bahawa DEB merupakan racun kepada pelaburan tempatan," katanya.

Beliau berkata: "Pada hakikatnya dengan mematuhi kehendak DEB, para-pengusaha bukan bumiputera telah maju. Syarikat-syarikat lama milik ke-

uarga kini menjadi syarikat-syarikat awam berhad dan modal bumiputera bukan merupakan satu perkara yang payah untuk dikumpulkan apabila syarikat-syarikat telah disenyapkan."

Sebelum itu, Dato' Sri Dr. Mahathir berkata oleh kerana Majlis Perundingan Ekonomi Negara (MAPEN) tidak dapat membuat sebarang kata putus mengenai satu dasar yang tetap, kerajaan tidak seharusnya menerima semua cadangan yang dibuat.

"Kini kita berbalik kepada cara asal di mana kerajaan terpaksa merangka dan merumuskan dasar ekonomi selepas tahun 1990 dengan sendiri," tambahnya.

MAPEN yang dianggotai oleh semua parti politik dan sektor ekonomi di negara ini, ditubuhkan untuk merumuskan dasar selepas tahun 1990 dan sehingga kini, bukan sahaja MAPEN belum membentangkan laporannya tetapi beberapa orang wakil telah bertindak meninggalkan majlis itu.

"Sebarang dasar baru yang digubal oleh kerajaan akan mengambil kira tentang perlunya mendapatkan sokongan ahli-ahli perniagaan dan pengusaha tempatan," katanya.

Dato' Sri Dr. Mahathir juga berkata kerajaan akan memastikan pertumbuhan ekonomi dikekalkan dan pada masa yang sama mengendalikan matlamat serampang dua mata iaitu membasmi kemiskinan dan penfusunan semula masyarakat tercapai.

"Kita tidak terburu-buru. Kita mahu bahagian bumiputera itu berkekalan dan berkembang dengan sendirinya walaupun tiada lagi bantuan diberikan oleh kerajaan," katanya.

"Ia merupakan satu hasrat yang tinggi tetapi kami fikir kami boleh lakukannya tanpa banyak gangguan," kata Perdana Menteri.